



遺民詩卷第十

寶香山人

卓爾堪

子任

選輯

李鄴嗣

杲堂浙江鄞縣人  
笑讀齋集

集世說詩

仰瞻四明山巖巍以嵯峨下瞰甬江潮汜滌而  
揚波山川氣交發人物亦以羅所以甬上士磊  
砢而英多邈然望千載猶未隔山河斯人不可  
作當如蒼生何

培塿無松栢薰蕕不同器士所志千載确然自  
表異廉藺已死人懍懍有生氣諸君雖見在厭





厭如下世委軀噉獐貉亦難得眠處喟彼九原  
人庶以慰翹企

處則為遠志出則為小草古人以為難出處事  
不小獨寢自箴誨高名庶常保

風景亦不殊正有山河異忽見此芒芒形神頓  
憔悴此語大傷懷吾重為出涕晉人初渡江營  
建甚草昧自有管夷吾同灑神州淚當軸適何  
人兩京痛相繼陸沈及江左藉卉併無地運自  
有廢興人終任其罪王謝舊知名風雅誰得似  
將軍磊砢流振袖時獨起鬚如反猬皮顧盼亦

可喜盤馬始兩轉一發應一矢慷慨常自言大  
白卽滿舉丈夫提千兵要在雪國恥志士痛朝  
危老驥驟千里若死戶牖間故自常奴耳

遺我故人札云是吳中迴知有相思字封而不  
卽開翩然在異鄉鴻鵠之裴徊焉能聞欵然斂  
衿乍一來契闊良已久亦欲盡所懷要當得君  
意古道無終乖

君何所欣悅但常得無事痛飲熟讀騷便可稱  
名士適取坐上書冀以暘尋味開卷一尺許果  
不異人意故須酒澆之自引著勝地



士固有失意形神若不交設復非快飲何以寄  
消搖一手持酒杯一手持蟹螯便足了一生積  
然任所遭使我身後名千載徒遙遙  
客着葛巾角卽取漉酒滓漉畢酒在樽以頭就  
穿取誰云家釀薄故復自佳耳故人適欵門相  
對作賓主稍通彼此懷應是我輩語不可不與  
飲隗然已醉矣

文章足名家自然合矩度發源在經史混混有  
雅致五色之龍章要在得裁製今人但揉雜不  
識自標置譬如明光錦裁爲負版誇體法旣不

存文采焉足慕

我生驗風骨宜置丘壑中相招得同趣採藥凌  
高峰荒榛橫今古人獸俱無蹤退還半嶺許雲  
氣猶蒙籠哂然作長嘯樵伐始得逢世人但翹  
首絕逕焉可從

世人俱慕官官本自臭腐世人俱愛財財本是  
糞土奚爲日皇皇使人忘寒暑不惜圖所難擣  
壑噉鐵杵入坐無面顏阨陋希言語客或有笑  
之怡然談名理願公勿復談但恐不免耳  
解維輒偃卧輕舟任波靡所過村落間吾乃不



覺耳舟人喜風生卧者亦笑起望見草堂門乃  
覺三十里捨舟旋登堂灑埽布席几我昔此躬  
耕歲月遂踰紀率爾去下舍良負故山水追諷  
移居詩歎美不能已

龍崖迤相接其山坦而平流通小白泉其水澹  
而清中有隱者廬其人廉且貞企脚北牕下涼  
風颯復生都不道陶公已得千載情

我來誰家地壘然墳在埜云葬某將軍此乃英  
雄也遺碑斷無水草間卧石馬惟遺一古松蒼  
鱗不可把枝條拂青天羣狐亂其下我來俯仰

間忽已淚如灑哀彼陳死人流風沂獨寫

春田聽鳴鼃閑門聊挈杖如數部鼓吹朝夕不  
停唱黃犢愛細草童子各遠放太陽初告夕歸  
樵已相望遙聞橫竹聲乃出牛背上

閑庭對好竹歡咏常不已一日無此君卽誰可  
共語體中雖小蘇若不堪羅綺里人適造坐相  
求為作敘近頗厭賣文吾靳固不與客去命偃  
扉移牀置隱几惟應此竹下當有清風耳

老來知遣懷不復經塵務終日守一卷人言我  
憤憤豈知意所懽不覺有餘事遂使人忘疲寢



食亦可廢誰云我已老髮白齒盡墜汝看我眼  
光尚能讀細字

東村諸田父相過輒傾卮我時造其門村人亦  
如之春來風日好故有相思時勸汝一杯酒倒  
着白接羅此中有真味外人那得知

贈語谿曹黃門歌

記葬楊侍  
御事也

銅人淚滴茅人瞰武皇寢殿罍恩陷杜陵狼藉  
虎文衣秋風劉郎看磨劍趙家冤湊一塔餅天  
陰啼雜馬牛聲不道一丘蘭上土有人月黑抱  
冬青此時鬼伯克如此日逼諸君上蒿里只從

野外哭忠魂誰識道旁流義髓義髓凝為千載  
碧山鶴照眼泉鳴咽家家骨煖一壘泥幾叢亂  
藁無寒食語谿黃門義丈夫肯將十匱覆黃墟  
樹上只容棲怨鳥田間不敢走妖狐墓石官階  
都不記小碑只篆嗚呼字碑前劍草發今春何  
人下馬雙垂淚安得燒瓶十萬堆盡掩人間義  
士骸萬盂麥粥千竿紙土花開徧髑髏臺神旗  
颯颯飄如雨夜中聽喚諸公語深蒙范式挽靈  
車多謝張融着高履

甬上寄懷鄧孝威二首



賀監祠堂下君來酬唱多  
野花紅照路春水綠  
生波鼓角遺民聚江山名士過  
無言此會易千載聽悲歌

避地非無事閑中撰述多  
桃花分世界鷗鳥主  
煙波亂後文章在人間  
甲子過祗懷吾友健翹  
首一高歌

散懷詩

山居萬事幸相便老僕家童盡可佃  
秋後豫編新鹿柵年來催種舊蚶田  
只充衣食餘從儉敢藉詩書自謂賢  
最喜歲收真有穀市中五石一

千錢

莫道當春春可憐初冬秋末亦能妍  
飄深紅柏東溪路餐過黃橙小雪天  
坐處微涼鄰竹借朝來新霽寺鐘傳  
始知逸少高懷妙不獨蘭亭風

日偏

右軍帖曰末秋初冬當快共為集

舍中一逕養苔衣莫笑經年但掩扉  
性與鷓鴣俱畏出才如家鴨不能飛  
只圖天使枯楊發所望春生病草微  
日照檐東新盥罷衰顏應亦有光輝

彭士望

躬菴江西寧都人



冬心

人才天地心長養萬物命學術蠱壞之好惡失  
其正舉世愛一同幻出千蹊徑標榜各是非傾  
危互機穽遂令天失權假人發真病盜賊九廟  
墟將相三本鑿方隅九萬里雞犬不能靜到今  
無悔慚耿耿勢彌盛天亦且奈何蓄怨不遑定  
螳螂怒當車精衛歡啣石物微志在茲之死不  
能息我老自悲歎深為少年惜卑者亡憤悻高  
者罕情實相彼古竒童比事連百十中分鸞鴉  
羣終露虎羊質汝從先進久嘉言咸耳食敢遂

薄高曾自矜無匹敵先進匪易臻險難備經歷  
眼中天下才得失心損益今尚老窮山久隱齊  
困阨汝則坐安飽紙上供劈畫古人糟粕存衝  
口恣彈射破釜螫蜂蠆立刻見本色事情失機  
宜軀命徒一擲和灰浣肺腸虛受師大易

齊姜語公子懷安實敗名手自殺蠶妾醉載驅  
之行此婦霸王師返國胡不迎吾儕久閒居遯  
尾牽柔情愛翫窮愁中繭縛絲縈縈加以傳會  
工多學戕英靈我思古賢豪割絕身事輕幹直  
蔭十畝朝華安足榮種種增華髮冉冉周星



中夜每不寢流涕聞雞鳴

古今撫盜賊當問源與流漢制選守令意乃重  
懷柔其時風尚醇解劍卽易牛建武十六年屯  
結連四州許盜自相擯不罪吏逗留但取獲賊  
多報最居上優賊解徙其魁受稟賦田疇自是  
戶不閉牛馬放不收唐有高仁厚立破阡能謀  
用一鬻麵人遂令全賊休六日五寨平未始加  
虔劉元則董士選守地嚴干振誅其囊橐奸賊  
出爭自投賊平黜贓吏畀火除根蠹盜賊卽黎  
民變化良有由苟且終撫局疽食正堪憂

人生無良友遂已無耳目面牆不得行亦復無  
手足手足卽有友舉履貳相屬耳目卽有友視  
聽一爲轂義皇以上人已有風與牧草木忘臭  
味鳥蟲親類族我友有至言盤古則孤獨拙哉  
張陳交晚節何傾覆名士爭功名忌如入骨鏃  
不殺心不安彼此各機軸禍發慎初幾燎原難  
救撲倘憶監門時鬼母夜當哭

古人好著書不爲傳其名心胸含萬古理事待  
人行左傳化工筆羅鏤裁衆形該括無遞遺萬  
變從此生佶屈記考功不一言人情濡削鑄禹



遺民詩十  
鼎象物何其精窈冥何代書滅沒誰所成或以  
為姬公或以為丘明其人古聖賢書反藉其榮  
仍襲後人久至今同一稱

玉簾泉

平波冰最文胡然此直下風霆散烟霜懸空偏  
飛灑小墜疑噴沫大鳴輒震瓦掩映蒼崖間蜿  
蜿白龍下牙爪勢翻騰鱗甲光閃射中更裊遊  
絲石隙數行瀉玉簾古所名杼軸何人者

六松歌為曾止山賦

未登六松堂不知六松高有幾意中蒼翠深烟

霜即予所植依稀似我植草堂前君植草堂後  
同茲草堂心前後亦何有君石田我茅屋手指  
青溪飲黃犢飯牛何必肥耕田何必熟可燒松  
子餐松葉松下哦詩自怡悅笑予饑眼望他山  
茯苓斗大何由食獨愛杜陵句四松如我長敢  
為故林主黎庶猶未康主人胸臆能如此松與  
盤桓定私喜冬夏青青萬古情沒草摧薪亦何  
取

晚眺

微風吹水葉溪上晚來涼岸草延深綠園花出



遺民詩十  
九  
暗香卽身觀損益獨立念行藏蟬響何時歇山  
山又夕陽

同祝仲立瀟湖泛月

十載江湖秋夢多月明誰共話烟波憂來只與  
青山近老去其如白髮何芳草同舟公子思落  
花空谷美人歌紛紛木葉辭前渚獨有西風戀  
黍禾

江樓聞笛有懷易堂諸子

歸路饑驅去路兵無家落魄半鄉城一身長向  
秋風老百感多從夜氣生湖海樓頭猶舊客關

山笛裏自新聲前津欲問梅川水不盡烟波寄  
別情

乙未夏五朔惶恐灘作

惶恐灘聲五月寒舟程出石報平安英雄此路  
老俱盡天地到今愁未寬白日下照水流疾蒼  
松高鬱雲孤盤江村漸急求湘鼓野客初聞涕  
獨酸

題三峴彭中叔青壁堂

青壁靚面幾千尺細看雲烟生石根須教日脚  
冬回谷獨許泉聲夜到門客子過談雜醒醉主



人宴坐隨朝昏芙蓉翠竹秋  
牕冷愁絕中原萬里村

雨漲

春雨連江漲百川蛟龍夜起未安眠  
平欺綠草全吞岸不讓青峰直到天  
傍險盡逢騎馬客乘流時有釣魚船  
吾生徙倚將何適空對芳洲獨樹前

蔣世紀

玉行江南江都人

隴頭水

嗚咽復嗚咽嗚咽腸斷絕日流生人淚  
夜流死

人血飲馬馬不肥澣衣衣不潔迢迢千古愁  
魂夢驚離別

邢昉

孟貞江南高淳人

石臼集

高座寺尋介立上人作

黃葉落未盡招提猶是秋日耽清寂境更上西  
齋樓風榛蔽遙阪寒景下荒丘惆悵故情歇難  
為永日留

同吉人元長聖獵過臞人山莊時予將

有武昌之役因以贈別

三載別君廬愛君門前樹颯爽延清風綠陰滿



庭戶脩脩數子賢越陌更踰阡相歡出雞黍因  
與話耕田緬思漢陰老俱言息機好如何有行  
役遠涉千里道惆悵動離顏悽其尊酒間秋風  
溢浦浪江月武昌山武昌新戰地楊柳多憔悴  
漢上轉含情樓端獨揮涕霜天獲稻功此際憶  
衰翁倉廩如相慰予寧再轉蓬

九江城南樓晚眺

卽晉征西將軍  
庾亮譙賞處

泱泱九江口日入烟濤深登樓俯危檻近見廬  
山岑昔人此譙賞嘉月陶幽襟長使千載下緬  
想南樓心孤城何蕭條殺氣餘秋陰交衢無人

行荒榛遂如林撫事遽成往含悽方在今履運  
適如此憂端苦沈沈

與見末別宿舟中作

欵欵田園留漠漠新秋夜夜露濕莎雞流連語  
初罷解纜一揮手惆悵月明下岸迴林木重猶  
似見君舍少壯各飢寒殘年操耜稔塗田歲不  
登豈遂薄耕稼

過王雨若故廬

斯人逝已久至今傷懷抱春風到門前十載吹  
芳草在世頗屯蹇立名苦不早沒後聞屢空妻



子益枯槁鷓鴣鳴桑田雲山漫浩浩吞聲更回  
矚愴此往來道

同弱翁爾止江加集徐旻若小園

春城扇和風習習芳菲路紆徐得三徑繆此幽  
棲處新綠已滿庭殘英猶在樹蕭條檐宇間時  
時見北固尊醪方欲展中坐忽回顧慷慨詘言  
辭世網苦多懼四月葭莢生江鄉水初豬拂衣  
可同歸耕桑事朝暮茅齋依稼圃竹牖垂瓜瓠  
生理儻不足更攜捕漁具

古興

漢道昔再盛投戈息羣姦矯矯梁夫子浩歌乃  
出關舉目覽四海慷慨涕潺湲我方遭世亂安  
能辭險艱常恐白日速不覩大運還永隨霜與  
霰泯滅蓬蒿間

夜過田家

寒溪水初弦小艇細如葉水面光炯炯烟中人  
語接舉家方夜作為我埽柴扉上堂無燈燭月  
色彌輝輝新秫登在場黃糧春在白咄嗟具藜  
羹欸曲陳盃酒人生更何欲桑麻共雞豚我適  
厭行役畢願休山樊



溪行屢經與亡友胡印度別處興哀賦

此

濺濺溪水側是子門前路涓流亂石間褰裳乃  
可渡憶昔造子廬欸欸平生故尊醪亦時有日  
晏未遑去相送屋東偏幽林每徐步歌岸注微  
波殘陽在高樹情因老易悲欲別恒返顧茲來  
溪草綠偶到臨分處予猶耿夙懽子已長不寤  
流泣但徘徊空慚子桑扈

二月晦夜雨

春氣未覺佳曉雨夜不止薄寒中我肌愁生安

能理遙憶故山中徧開桃與李屋上鳴村鳩門  
前長春水戚戚蘊憂端四時無窮已所嗟值芳  
辰抱愁從茲始

琵琶亭下作

北風拍浪吹帆破百尺檣高浪中簌千里已到  
九江城日落琵琶亭下過琵琶亭空水繞天嶺  
响四角含秋烟當時風景復何有楓葉蘆花猶  
宛然此地連年兵革苦前月殺人如刈楚岸上  
無人鬼哭多江邊白骨堆成土我來湓浦更逢  
秋祇聽江聲咽復流孤城未有三家店旅客曾



無一葉舟艤舟夜宿潯陽郭東船西船非估舶  
安有商婦撥琵琶能使天涯歎流落亭子蕭條  
亦可憐琵琶聲絕戍鼙連誰知此夕江州淚非  
復傷心為四絃

黃子仙裳才情妙美走山澤以樵自名  
丁亥春渡江來視其師陳澹仙先生  
古誼過人殆有季布嚴仲子之風蓋  
不徒隱于樵者也為賦短歌

子顏白皙我顏改六代繁華竟安在相逢訝子  
正少年早入深山事樵採懷中抱璞將如何翻

然出戶尋斧柯家本蒼茫接湖渚愛登巖洞尋  
烟蘿平生心許州刺史片言宛可同生死縲紲  
誰明越石賢解驂不逢齊晏子子為呼天天豈  
聞彛門肯負信陵君明日報恩事已了却把斧  
柯歸白雲

### 捉船行

江上泊船風浙浙繫岸排檣纜相結頭白老人  
向我語一生駕舸離鄉土自從海內徧戈鋌歲  
歲闌江始捉船前年兩男駕一舸縣官捉去黃  
河邊去後曾無一寄書不知生死今何如伶俜



回鄉絕鄰伍却附他船為把艣五月淮南卸商  
貨渡江驀遇王船過一王已過二王來捉得江  
頭一月坐王船聞說到吳城捉船盡載遼東兵  
老人知向廣中沒應是無人收白骨

早稼

秋陰滿一川刈穫在漁船及此為農日空知惜  
老年水村連白鳥溪屋覆青烟日暮聞春急生  
涯亦可憐

同翼仲鳳遊寺觀月

夜久雲俱斂寥寥松月微竹陰涼院磬蟲語寂

僧扉河漢忽然澹家人應望歸秋風明發後又  
見葉初飛

聞戴敬夫繇越入閩

湖縣忽離羣兵車諒未聞揭竿真草草暴骨竟  
紛紛秋隔茗花岸心悲建業雲遙思于役意不  
為武夷君

大勝關看落日

片帆來別浦落日忽啣山水色浮遙岫秋風孃  
故關浪低孤鷺過月出斷雲還戍鼓何勞急淒  
清岸葦間



清明前一日宿蜈蚣渡遇雪

此夕離家宿淒迷烟浦間如拳飄白雪到眼失  
青山節換新鑽火天寒舊旅顏更聞多寇盜祇  
在落蓬灣

讀祖心師瀋陽寄書感賦

遼東臨沮水師去是何緣世已他生隔書猶過  
海傳馬韓通大法羝乳憶前賢知有歸來日應  
須十九年

酬崔明府再過敝廬

垂楊夾溪路日暮枉驂駢細雨干旄濕閒門燕

子歸烹葵邀醉淺拔薤喻言微何意桃花發春  
風再欵扉

懷于皇

憶在丹徒縣登樓楊柳春虛誇橫海甲驚見隔  
江塵淚盡聞輦夜生遭破國辰終當共飢渴飄  
泊對沾巾

雨

荒廬十日雨野水接柴門幽蘚重重色枯蓬寸  
寸根榻遷寒夜漏壁帶草書痕復此愁霖日銜  
悽度曉昏



爾止自余邑寄詩次韻答之

君猶歸未得那復問予歸雖各有身事知同賦  
命微舊山田不薄久客貌難肥鄉夢催帆發相  
隨一鴈飛

江行始見蘆花

帆輕雨始殘風急屢鳴湍不是蘆花白那知秋  
水寒著烟同漠漠似雪待漫漫一望長風夾淒  
迷勢更寬

江夜次介立上人韻

日下平川迥舟從疊浪過岸孤人語絕風細葦

聲多遠鴈天邊陣荒雞夏口波楚江蕭瑟後無  
復大堤歌

同于息菴山行

日色遠林澹溪山未覺寒斷橋村路僻古樹鳥  
巢安他縣兵聲急高原稻穫殘君言此鄉好數  
過亦非難

溪上

溪上春猶在鶯啼只自嬌出遊真汨汨棲宿轉  
蕭蕭夜雨沾桑土楊花上板橋平生感羈旅未  
許似今朝



雨後山家始見桃花

山家雨初歇行過始知春草色未盈路桃花能  
向人間宜臨淺水暖欲傍通津莫訝風吹急晴  
看陌上塵

又得涼字同于子重

已識舊山路偏因枉渚長潦田新浪白喬木遠  
烟蒼蘿影交鄰舍牆陰起暮涼微風隨返棹屢  
折過漁梁

蕪湖訪陳伯璣

自為千里客歸路日榛蕪井邑稅空在詩書壁

有無砌蛩秋乍冷蘿月夜方徂嘿坐彈琴罷心  
知此調孤

春雨

鶯啼長共白雲幽應有楊花舞陌頭獨歎離家  
春又盡自交寒食雨無休荒村麥隴平飛燕新  
水漁磯亂泊舟却對東風一回首暝鴉棲樹思  
悠悠

送陳簡菴之嘉興

朔雪梅開更幾春相逢駐馬鬢絲新征衣再濕  
江南雨行子仍為澤畔人孤驛酒醒聞過鴈芳



臯語細傍離津遙看草色青青處却對東風黯  
別神

秋日寄吉人

黃雲滿目潦將收亂世耕田合白頭榆葉晚涼  
消宿雨茅簷歲計足清秋木綿漸近鳴機舍絲  
網新牽出港舟歲暮與君成久別不應身事獨  
悠悠

過金度城南新居

卜宅郊原更掩扉浮雲世事迴相違穿林路仄  
逢僧到盡日門開見鳥飛雙樹雨殘聞梵去高

岡月出荷鋤歸相過擬似南鄰老向夕辭君露  
濕衣

逢韓茂貽因贈併追傷戴敬夫

莫道相逢久歎嗟尚憐流落在天涯故人長隔  
黃墟面茗水空餘白雪花行路更無磨鏡具扣  
門惟識賣漿家羌村暮雨歸何處青草茫茫去  
轉賒

和祖心遊城南訪方正學先生祠

寂寂荒祠野靄昏蕭蕭殘碣倚松根金川門又  
成亡國石子岡偏欲斷魂昔日麻衣慚叔父於



今青草失王孫廢興自古須臾事獨有先生戀  
主恩

避兵還舍率題壁間

江村歸日暮桑柘半成墟惟有蒿蓬色青青滿  
故廬

題鄰家桃花

始見天桃藥梁間語雙燕燕巢猶未定花落已  
如霰

客思

客心如遊絲偶墮青苔上一受東風吹晴空卽

飄颺

江南詞

向曉颺塵起青門舊路斜御溝流水盡日日過  
牛車

却怪門前鴉不啼烏桕樹城中聞馬嘶未曉鴉  
飛去

山家雜詠

童子朝眠起枝頭打乳鴉鴉飛還繞樹不肯去  
西家

哭麻孟璇



憶到春牛寺裏時風前繫馬綠楊枝雙溪水盡  
淚不盡流到重泉君始知

發蘄州

昨日垂鈎釣寒水白魚如銀偏掉尾烹魚酌酒  
思故鄉望斷波間一雙鯉

秋杪經印度墓下作

去年門巷飄黃葉話向殘陽憶共君今日西風  
寒景裏紛紛黃葉上君墳

漢口始泊

蜀江船不到三巴湖南船不到長沙滿地干戈

關塞裏行人那不早還家

沈壽民

耕巖江南宣城人

贈吳次尾

巍峩望陪京惻惻涕淚新握手風蕭條邊馬聲  
酸辛據鞍三山頭感慨大江津寓目覽舊迹蕭  
條愁殺人荒郊千里別歸為山谷民夏日苦難  
夕冬夜苦難晨水流長泯泯花落空紛紛遠懷  
積秋浦相思在河濬鴈飛不可接鬱結何由陳

杜紹凱

蒼略步山湖廣黃岡人

丙寅秋訪朱林修溪上作



酒渴詩人愛雨天  
迴光塔火鷲峰烟  
今朝記得真相送  
桃葉溪頭不上船

君買青溪水一方  
幾株垂柳豈尋常  
再來只看鍾山畫  
挂到三更月滿廊

蔣

注

曙來江南長洲人

重表唐伯虎遺墓

詩作生涯酒作年  
縱觀大地總荒阡  
人間遊戲終嫌窄  
天上常容詩酒仙

胡從中

天仿江南山陽人

釣臺

落木荒臺白日昏  
讀君詞賦弔王孫  
古今多少垂綸客  
誰似南昌早閉門

何

黎

雍南江南丹徒人  
涪涪閣詩集

雜興

嶧陽桐亭亭斷成  
綠綺琴金徽映朱  
絲鏗然琳瑯音  
天外鳳凰至水中  
蒼龍吟伯牙稱高  
操僅獲子期心  
高山猶巍巍流水  
自沉沉世人徒有  
耳往往絃上尋  
重華難再邁悵望  
湘江深

競渡歌

蜃氣吞斜日  
黑雲壓白波  
且莫吹蘆管  
聽我競



渡歌歌聲高響遏飛雲江河簫鼓逐紛紜輕揚  
楚些三山落急促吳謳十里聞吳謳楚些共迢  
迢蘭橈桂楫任逍遙千隊彩鸞翻日暗五色游  
龍挾浪驕吳綾花蓋艷越錦畫欄鮮透迤開繡  
障錯落捲珠簾珠簾繡障裝金屋怪鳥竒花剪  
綺縠龍女手中一珠來馬卿座上雙蛾簇西陵  
少婦逐青驄南極老人騎白鹿宮監划船扮採  
蓮金甲將軍花箭箠可知水戲競繁華一時工  
巧空杼軸朱樓次第開畫舫蟬聯續柳岸繫花  
韉葭渚懸牙纛列綺共炊金羅珍擬饌玉饌玉

炊金粉黛媧輕靴穿袖嬌如花明璫兩耳垂雙  
髻綠螺點映遠山斜窈窕燕姬簪艾虎清揚趙  
女撥琵琶琵琶撥動疊飛觴往來觸目盡琳瑯  
伊涼曲雜十番鼓引出翩翩游冶郎牙籌高促  
呼盧帽金爐細裊辟邪香石榴花泛菖蒲酒笑  
傲妖童醉欲狂盤游十日難回首羽書報進圖  
山口一夕傳呼徹管絃連宵號令嚴刁斗樂極  
倏生憂鉦聲逼上游海嶠風角勁江嶺馬蹄柔  
江嶺一望起黃氛萬艘樓船兩岸分城頭忽樹  
盧循幟江上徒坑趙括軍趙括軍坑舊京震石



頭城下五花陣合戰戈船棄甲逃朱方一炬成  
灰燼可憐昔日錦城空徒見今宵鬼火紅土室  
飄搖悲夜雨單衣蕭瑟恨秋風十萬魚鱗軍營  
集軍營鱗集軍需急何地不愁牧馬嘶何人不  
抱寒蟬泣鬢篋橫吹草木驚流離亂竄弓刀鳴  
呂嘉銀印思邀賞馬援銅柱欲標名傷心多負  
田文息攘臂愁逢北府兵何來捨地呼天日不  
盡徵歌買笑情才看虎帳烽烟熄又聽龍舟鼓  
吹聲

少年行

臂繫金鞬學射鵬翻身下馬脫紅綃酒酣高唱  
涼州曲拋却銀箏弄翠翹

朱之臣

無易菊水四川成都人  
梅龍集

司空樓

寒蟾夜艷秋光白金魚鎖斷無消息入門風碎  
珊瑚聲幽修鬼語方花碧石城公子古錦袍曳  
雪秦娘暖玉簫蘭膏小鬢雙蛺蝶越羅袂輕憐  
嬌嬈唾月搖烟夜半舞燭光如燾研丹戶迷人  
不惜水衡錢鈎欄複道尋郎主江陵鯉魚泣幽  
素陽春門下官家署華表仙人夢正長化作濕



螢上樓去

莎羅坪飯

何處仙人掌前峰路不賒泉飛昨夜雨菊綻老  
秋花破碎中條小微茫清渭斜胡麻和石髓飽  
飯道人家

周

斯

二菴江南溧陽人  
悲歌集

美人芭蕉

露濕芭蕉綠滿亭斜歌石笋半天青東風惹起  
美人怨時作瀟湘夜雨聽

白溝河

遼宋分疆在白溝時人空怨石郎謀長河本是  
無情物却為中華嗚咽流

燕山三老

一居良鄉縣南五里一居商家林一居單家橋

圓冠方領漢衣裳地逼燕山倍感傷三老何如  
商四皓不從太子似差強

崔干城

免牀河南寧陵人

送趙完璧游秦興

五十餘日邗之滸青山青眼隔江語白鴈飛飛  
黃蘆乾莎雞叫月還振羽分付西風洗釣磯蒼  
雷紫電驅秋雨歌鐘安得聒漁竿子歸來兮自



上處方外嵩山容易逢海澨伊誰逢唐舉

秋日文選樓再晤鄧孝威賦贈

卽少名山約安能間道歸久羈慚托鉢惟子念  
無衣夜月申前夢秋風報合圍兵間護風雅此  
日更誰依

西山同岑楚則王說作陳喬生梁藥亭

陳元孝集高望公客齋賦

青山野水各棲遲亂世相逢喜復悲地似新亭  
留草色心隨落月向天涯尊前雨氣侵高堞原  
上秋風弔古祠白首壯懷消已盡誰家明月夜

吹箎

張映室

文宿丹崖江南儀真人  
紉蘭集

和談長益扇頭詩句

客懷難具述尊酒且同傾慰我還家夢憐君破  
浪行身閒容入道意熱尚談兵終歲空林下憑  
人說宦成

秋日王咸吉過訪隨邀至吳錫初水亭

看海棠次日投以詩用韻和之

鱸肥蓴滑及秋時張翰歸來較已遲水檻一尊  
三客共窮途千緒兩心知評花徒羨昌州種待



月頻傾金屈卮後會未期勞折簡東籬菊放再  
題詩

王

醇先民江南江都人  
雲籟

夜集陳師仲園亭

躍靈促飛轡逝水無旋期因之愜朋友樂晏夜  
忘疲紅粉環廣座玉醴無停卮七盤妍妙舞鷗  
絃清且悲華軒俯金塘颯颯涼風吹嘉魚躍圓  
波素月流清暉驩棕在茲夕不醉徒爾為咄嗟  
身後名達者烏用之

玄暢閣送袁崇父

忽惹繁憂入搖搖向夜初知勞別後夢恐斷客  
中書蟲語依人冷燈光映水虛投交自童稚莫  
為世情疎

張雅度

介茲韓臣江南江都人

旅夜

作客禁寒夜無端起百營布衾霜氣入頽棟月  
華生朔雪千烽戍黃雲萬堞城星星思往事愁  
恨獨分明

道上霜

飄風停向曙凝露落霏微輕白先霑草深寒竟



染衣蒹葭塵外宅  
雨雪意中幾  
獨鶴鳴何切  
江船載不歸

東蔣子久

秋天無一事  
獨坐對晴暉  
萬木皆黃葉  
孤亭飲翠微  
衰顏思學道  
不語近忘機  
惆悵風塵際  
閑身未有歸

咏秋海棠同伯紫

零亂階前卉  
秋風到爾曹  
澹能依石隱  
開不傍天高  
蟋蟀思豳什  
江蘺重楚騷  
後時吾念汝  
獨負此生勞

杜于皇龔孝升步杜少陵何將軍八首

因屬和 選三

落落古堂靜  
柴門傍水開  
池清低白鳥  
樹密隱青梅  
石勢排檐入  
松聲倒澗來  
鐫題遲歲月  
風雨送莓苔  
雨過流新綠  
無枝不吐香  
蔗漿欺酒澹  
竹氣到衣涼  
壑迥風雲變  
峰迴日月藏  
小亭高木杪  
環堵自蒼蒼

山川應愛客  
造物尚誰何  
但覺尋幽少  
翻嫌涉世多  
青林容我老  
白水聽人歌  
不自迷津路  
無



妨旦夕過

宿昔

頗牧非嘗見登壇浪得名迂疎誇緩帶敢決負  
橫行報主何長策酬知問秉衡獨饒勤遠略先  
識受降城

姜安節

勉中山東萊陽人

越州秋興八首

選二

八月秋濤漲海門江間風雨送黃昏平沙鴈落  
邊烽影古堞鴉啼戰血痕南渡君臣餘第宅北  
來戎馬半乾坤天涯力盡登臺望一賦難招楚

客魂

城郭荆榛滿夕暉新亭舉目事全非露臺淚滴  
金人掌寢殿塵驚玉篋衣宿莽芳洲花更落陰  
江寒雨鴈孤飛何年採藥師劉阮長向天台去  
不歸

吳

鉏

原名祖錫稽田浙江嘉興人

重修信陵君墓

六國安危只繫君握符兩度抑秦軍函關此日  
幾亡雉芒碭從茲漸起雲未見特牛陳大俎斲  
將醇酒酌高墳可憐異代留毛薛徙倚夷門到



夕曛

董道權

秦雄巽子浙江鄞縣人  
缶堂詩集

雪中答李杲堂

鄮陵孝廉重然諾約我今秋醉桑落先人有友  
官并州我欲從之客鴈丘高堂有母缺甘旨負  
米何辭數千里杲堂李子憂我閉門饑欲死告  
以遠行為色喜酌我黃金罍贈我青銅錢低徊  
不忍別此別須經年袖君之錢醉君酒城東城  
北頻回首歸來兒女候柴門笑指餅中不盈斗  
牽衣問我欲何之今年豐熟仍苦饑爺未出門

共爺語爺既出門啼向誰示兒袖中錢故人佐  
行李移與易米薪且以救妻子量米數薪堪作  
數日食買舟無資行不得他日仍登李子堂李  
子為我作歌聲蒼涼曳履依然守蓬蓽得酒且  
與傾壺觴昨夜雪花如掌大草閣嚴寒只僵卧  
午餘日色照西牕起把君詩讀幾過牕前冰雪  
消有時惟有故人顏色長相思

王麇友同宿客舍志感

廣陵城中夜擊柝廣陵城頭啼烏鵲爾我相逢  
語正繁僮僕無情睡先着微風忽起搖燈光輕



寒稍覺侵衣裳鼓聲坎坎下三四解衣滅燭眠  
匡牀與君展轉各無寐細數年來不得志為惜  
天涯此日身轉憶先人舊時事君家曾祖大司  
空清名文譽開江東神光兩朝焚諫草燕齊百  
郡銘河功聞訃朝廷倍惆悵特命春官予祭葬  
卮酒分出天府漿墓道築就東園匠此時萬國  
來車書至尊別殿夢華胥潼關烽火起倉卒延  
秋龍種爭欹歎若翁司空冢孫子自拜國恩心  
國恥策馬請監丞相軍守城遂同丞相死此時  
君作懷中兒何處尋來馬革屍今踰二十善詞

賦蓼莪開卷徒傷悲吾翁若翁交最好吾翁賢  
書年獨早七篇屢下南宮第一表盡敝長安道  
負囊簪筆越王臺角弓鐵騎吳山來白眼世上  
共誰語散髮江頭祇自哀閉門著易忘暮年把  
酒讀史呼蒼天嗟我三十尚失意山高著述何  
時傳若翁遊魂歸未得吾翁買土葬無力相逢  
此地喜欲狂相看今夜愁如墨披衣起坐聞荒  
雞攬槍在天明月低

吳懋謙

六益江南華亭人

燕京秋懷



仗內傳呼驍勇士詔書親自獵龍堆卽看羽衛  
凌晨出遙見旌旗大駕來十道貔貅御馬苑三  
秋金鼓晾鷹臺君王樂事真無限烟鎖彤墀晝  
不開  
紇干朔氣馬毛僵野燒千堆照大荒青塚黃雲  
驅斷鴈白登黑月射羣羊烟花臺殿非吾土南  
北山川是異鄉萬里天涯真夢寐征笳急管意  
茫茫

春閨

人去經年萬里愁梨花空自發西樓朱簾春暖

穿針線繡到鴛鴦淚暗流

玉釵寂寞暗生塵細草微香壓錦茵燕子尚銜  
花片舞憐君何事不知春

題王歙州天女圖

曉雨絲絲濕紫薇凌空忽下六銖衣王郎不落  
人間夢遙見雲駢白鳳飛

潘

紱

來朱四川大足人

老女吟

少小羞聞戶外言不知媒妁幾寒暄無端忽聽  
鄰家語笑整荆釵獨閉門



湯祖武

允繩江南蘇州人  
吹吹閣稿

夏日移榻

不遠此樓下宛如空谷中何曾分戶外亦未隔  
牆東布席緣防濕寒帷幸有風博山與沉水消  
受果無窮

臘月十五夜看月兼送弘載弟往盱眙  
閒心休對月久望亦生愁卒歲無多日離人不  
可留三更容獨醒十載憶同遊任是深山客時  
危易白頭

暮春送小兒沐讀書長干

百里春潮共幾灣此行正及送春還重陰遍綠  
家家樹積雨猶寒面面山亂劖雲根披草逕遠  
依木末掩松關良辰清課能無負椀茗餅花未  
可刪

戴

易

南枝浙江山陰人

釣臺

選三

驛路秋風曉角鳴荒祠七里對灘聲誰家江濶  
復垂釣何處山深早課耕赤伏舊傳天上至白  
雲閒向隴頭生當時賴有從龍彥却使幽人享  
太平



灘響潺潺七里流雙峰高並白雲浮人生東漢  
身堪隱客到西臺淚未休戰伐幾同滄水日流  
離已甚汴京秋霜風落盡衰林葉日暮長歌卧  
小舟

潮聲直達嚴灘夜山色橫連漢苑秋千載故人  
終作客一時諸將盡封侯鄜南九世傳佳氣江  
畔雙臺控上游把釣耕田真樂事太平時節我  
何求

客廣陵有感柬王勿齋

江山何日到今宵漢晉隋唐又宋朝安得二分

明月在白頭孤客聽吹簫

風塵自愛滄浪館誰望中原拱極臺木塔幾經  
興廢後知君愁見野梅開

邵

潛

潛夫江南通州人

寄陳仲醇徵君

日落江樹昏碧雲起天末曠瞻幽人居山川杳  
難越容輝一以遠十載徒延結離夢或見之躑  
躅中腸熱安得披芳襟慰此長飢渴

仙姑洞

仙女乘雲去不還桃花流水洞門閒朝懸明鏡



澄江上畫出雙蛾是遠山

丘維屏

邦士江西寧都人

贈南豐張曲江明府

張公大是好男兒見聞裂紀千條紙秦邊燕市  
四十年南豐一載徒戲耳手拋雙文篆與人吳  
鈎獨看思紛紛相逢但是五陵子且與遊獵江  
南春君不見南人水嬉張連弩潮生月白起擊  
鼓何須定住南山邊射得大魚如射虎

徐芳

仲光江西南城人  
松明閣詩選

過虎巖

猛虎高卧處遙泉挂其端簌簌如飄珠天風吹  
之寒素茅踐我足玄雲覆我冠三過不肯入始  
知山隱難

夏日芙蓉峰登眺

芙蓉不待秋照此蒼天好幽人無限情登之夕  
陽道超遙見遠空微茫出洲島下界遞冥墨上  
方一虛顚踈足步流霞澄心對清昊花為獨放  
遲鳥為孤飛最早憐巖下百尺松不及峰頭一  
寸草

城門高

城門灘名在延津上流五十里



城門高城門側城門之高高入雲城門之側側  
如壁約束數十餘道之飛河至此欲去去不得  
河伯怒不平拔劍起相爭疆禹不勝東西走劈  
取中流一線行天吳坐城北長蛟鎖城南蝦蟇  
百輩走耿耿直取龍津為窟宅干莫夙駕蚪螭  
驟至今寂寞扁舟夜時聞鏗錚鐵馬酣燕子巖  
雄雞石到此箝口但嘖嘖占盡閩南萬里山只  
許蒼天分幾尺不信人間有滄溟梧勺湘湖河  
漢窄城門高城門側與子期乎日之夕收拾風  
波莫亂生坐中更有屠龍客

踏月行

昔年此地月明中短笛輕箏處處逢把臂踏歌  
歡不足凭高一笑生長風此地今年此夜月照  
人憔悴鬢如雪空階獨影最消魂淚灑溪梅幾  
樹血血染溪梅花滴亂花開能有幾人玩忽然  
野火噴空來此是愁腸寸寸斷斷絕愁腸只自  
憐寒宵過半未成眠川陵大地更都盡孤月何  
緣獨在天天意冥冥難可必載途豺虎恣充斥  
不然此日醉上宮傾耳無聞萬家泣誰向江頭  
唱黍離一歌一哭少人知隔岸啼鳥如解語遶



盡長林不肯棲此時壯士皆髮指俠氣千秋凌  
易水躑躅馮夷倚怒流羣龍噴薄雷風起雷起  
風飛斜月度暗霜遍結沾衣露撩人山影伴人  
行回首寒江生白霧

立春日賦示武陵諸友

斗室迷星曆從人強作春懷沙心可屈蹈海客  
難秦湛露沾花曉長天照眼新卑身非彭澤何  
許答芳鄰

新晴

晦冥剛月許幽鬱已難論不覩雨暘意焉知天

地恩巖光肥石耳峰色瘦雲根樵牧爭茲日紛  
紛烟外村

晝寢

幼女三齡而慧夏晝倚卧樓頭捉戶  
伊啞不輟呵之輒曰儂開戶為晝閉  
戶為夜未已又開目為晝閉目為夜  
予聞色喜而有此詩

閉目聊成夜開眸遂入晨晦明彈指事老壯隙  
駒身月解流連照花知再四春最憐流浪處千  
古夢相因



喜渡河洛再過伊闕

次第鄉程減龍門入望真遊絲天際路歇馬渡  
頭人繡佛雙崖古流花一洞新頗矜伊洛道從  
此稍知津

渡孟津

征車不可歇夷險且相任天意限南北人行自  
古今躍魚雖有力飲馬豈無心惆悵剗舟者功  
高亦禍深

五日竺峰登眺有感寄家升伯

雨中十里如千里亂後頻年異昔年更是他鄉

憶離別能無佳節重流連平分小暝歸遙夜碎  
點浮峰出遠天小弟無知兼幼妹輸他蒲黍各  
紛然

五日遣興

長日沉沉曳薜蘿松門垂首憶蹉跎年過五日  
虛將半歲上三旬去已多儉腹并能餘舊李量  
身衣欲製新荷丁東羯鼓村頭聞知是羣兒學  
楚歌

古樓峰晚眺

山清在薄暮幽戶無來往將身與松風吹到明



月上

冬日宿淨土巖

朝來石室開幕來石室閉中有石心人自寒不由歲

惲日初

正叔江南武進人

野晚

平野蒼茫倚醉行無邊霽色共雲生疎林夜徑寒谿影隔岸秋亭落葉聲霜露單衣知欲下杖藜新月澹相迎山前歸路聞人語驅犢深烟未罷耕

燕京雜感

桑乾河北倚高樓金錯刀寒攬敝裘秦塞淒涼聽觴策漢宮哀怨入箜篌月明組甲三千里風動瑠弓十六州莫是帝城文物在師臣談笑待封侯

宋 佚

未有原名之盛隱廬山

送茅與唐入宜興山製秋芥

孤客崙山去山中秋樹蒼雲深霑袖冷烟暖焙茶香處處供雞黍村村熟稻梁此行余有待未及共相將

34

P39

后 編碼 乱 內容 連續



答友

世風輕薄甚所重有黃金古道誰相許與君結  
此心書傳邊塞少情共棧雲深萬里孤踪客懷  
人費苦吟

山中夕照

林壑有餘色夕陽猶在山浮雲休亂起還讓照  
人間

汪弘淦

澄一江南歙縣人

寄謝同門曹翼宸

春華秋弗榮情恥與時馳淵藻陸弗登厥性匪

攸宜萬物具靈根成瘁視等夷寧曰大化忌戕  
賊身先之緬惟束髮初南北鮮停騎賤軀不自  
好進干若素期豈信質分薄裁成寡良師彼蒼  
無終棄鴻纖各有知旣膺參苓賞復附桃李枝  
犖犖十年餘力命存於絲感君重意氣慙慙遠  
致辭軒車誠夙慕媿乏富貴姿嘯歌念已癖薇  
藿食如飴春還沛澤及將從事東畦長揖謝使  
君恐遺草木嗤

莊居懷澹社諸友

苧衣蓆帽了餘生半畝瓜畦傲邵平篆石苔從



新鷺破冪陰樹縱老鶯鳴閒過鄰叟無苛禮偶  
涉江干盡論兵遙憶郊遊應落落經年緘不達  
蕪城

初夏擬移家五泂

青山典盡意何如遠寄江涯學荷鋤餉午盤傳  
新茁韭銷時笥檢舊刪書雲聯斷靄天光靜水  
溢危橋客屐疎笑傍繁陰謀小築秋風共挽鹿  
門車

崔子忠

青蚓一名丹字道母山東萊陽人

送僧歸滇南

兵戈前路息萬里憶慈雲冬嶺春花艷秋江暑  
氣熏到時書少雁去日夢隨君最是悲涼處遐  
荒收夕曛

李恒焞

香河北直人

渡錢塘江

一棹吳兼越秋風江上生江潮多少恨常作不  
平鳴

陶葉

苦子廣東南海人

聞孔樵嵐營北海書院東之

北海遺墓側聞君闢講堂先賢但有跡未可使



淪亡況君為其後安得不遑遑尊滿直細事所  
期聖學昌從來創始難此舉非尋常倘遂肯構  
志負笈從維揚

王

民式之江南江寧人

### 虎丘守歲雜意

春汲家家靜羈人慨百端立身孤隼共歸棹埜  
萍繁敝舌誰能視殘碁不用完升沉付流水無  
恙獨漁竿

王

壘

遜初浙江山陰人  
匪石堂

### 次柴桑乞食和杜于皇

嗟余為乞士乞固任所之斗米且千錢豈曰乞  
無辭行行涉吳會江山趣我來所至有古處頗  
不廢茗杯勝攬日不足暇則拈陶詩風格倘難  
嗣亦各言其才興至每獨領安用世好貽  
古人抱高趣一往率意之輩士誠不屑任達無  
飾辭陶公棄彭澤夫豈甘嗟來要以天懷適取  
足充吾杯杯至情自親興發便哦詩安知百世  
後而有杜子才悲歌續天問抗懷金石貽  
一飯矢冥報母乃已甚之壺餐與羊羹施各異  
情辭興亡隔霄輒豈不以食來白眼古今際沉



沉醉鄉杯柴桑淵穆者憤發乞食詩虞翻痛知  
已青蠅乞弔才慨慨寫所寄詫歎曼聲貽

再和

阮公哭途窮乞郡終去之處仲擊唾壺伏櫪有  
悽辭誰爲拄如意山色雞籠來安得座上客恒  
滿無空杯數公磊塊士肯吟北門詩時運一以  
乖落落埋英才支離吾自慰終焉薜荔貽  
緯蕭彼何人明珠能棄之咄咄童子鴻人熱恥  
其辭丈夫有七尺肯爲饑驅來少陵潛悲辛冷  
炙與殘杯供奉樂千春醉飽託長詩天地何不

仁困此萬古才去去南山陲寧無紫芝貽

日日登高臺臺高四望之北眺大海潮瀨瀚發

雄辭西瞻鍾山雲茗茗紫氣來明月挂東嶺照

我樓上杯杯盡忽長歎且吟皇甫詩當年王孝

伯豈非一世才

皇甫冉有萬歲樓詩樓初于晉王孝伯恭

何如濠上叟儻

然秋水貽

王方岐

武徵蒙谷江南江都人

讀史有感

莽莽荒塗未肯休攤書遙集古今愁朔方舊費  
平羌策南海虛誇下瀨舟廝養卒多橫印綬賣



珠兒亦列通侯古來君相多黃土惟有青山未  
白頭

感舊

空齋寂歷學安禪每值窮冬更颯然獨犬守門  
眠落葉羣雞號樹上墟烟無求何用虞來日有  
悔常因憶昔年爲念苑枯何獨異隔鄰簫鼓正  
喧闐

朱 璽

若符江南鳳陽籍宜興人

村居

同吳長人賦

庭垣歆傾葺荆榛日日溪雲冷作鄰三徑蓬蒿

嗟類蔣桃源雞犬不知秦家餘經史生涯薄人  
習農桑里俗淳寂寞杜門無箇事碧牕高卧夢  
先民

亂石蹲流咽浪花午橋風送柳陰斜頭髮久與  
峩冠遠囊澁應無濁酒賒策杖隴頭羣豕犢班  
荆林下話桑麻東陵自古饒名隱譜入烟霞第  
一家

徐 柯

貫時東海一老江南崑山人

白紵詞三首

揚朱脣激玉齒鸞迴鳳舉爲君起哀絲悲管聲



相倚體如輕風拂淶水月落雕梁燭影微霜露  
繡幙鑪烟霏永夜迢迢客忘歸吳歌白紵世所  
稀

吳刀剪穀散雲霞明璫翠帶紛交加美人服之  
艷春華停軀斂袂思無涯思無涯動若神揚蛾  
送笑誰目成白玉牀前橫自陳

玉壺礫椀赤瑤卮紅妝翠腹素手持千觴萬酌  
君莫辭聽吾前歌白紵詞盛年一去如流電佳  
期遲暮歲將晏及時秉燭夜申旦莫令不樂心  
煩亂

東飛伯勞歌爲任較書兼柬沈推官劉

進士

映水山雞照鏡鸞玉清萼綠追新歡誰家妖姬  
倚錦瑟調弦撥柱歌昔昔玉壺礫椀赤瓊卮珠  
槃金環紫綺衣年時三六逞華艷粉光衫色隨  
時變紅臉當春不自持可憐絕世更誰知

張

蓋

覆輿永平人

贈申涵光

草澤賢豪盡上書奎章閣外卽公車我甘漁父  
因衰老獨有涵光是隱居



沈壽客

無謀故城人

金陵詩

淮南作客逢春雨破帽疲驢幾日程六合城邊呼舴艋綠陰相送到南京

洞庭句者

居洞庭山

絕句

不信乾坤大超然世莫羣口吞三峽水脚踏萬方雲

有形皆是假無象孰為真悟到無生地梅花滿四鄰

汪

颯

再見

遺詩

冰泮水還清雲開月方潔一旦破樊籠逍遙從此別

盧生

歇菴江南泰州人

南屏

繞湖山疊疊樹密是南屏近見千重翠遙浮一點青疎鐘常拂水高塔不鳴鈴最愛斜陽下扁舟沙岸停

朱祐

叔子江南丹徒人



贈張諧石雪巢

不見張衡三十載相逢邗水顏俱改自額茆茨  
曰雪巢贈詩行卷若牛腰堂上老親年已耄掌  
中稚子齡方妙從來志士無石儲乞米有詩兼  
有圖維揚販負多大賈先生閉門羞噲伍羹藜  
不羨五侯鯖擁書自比南面城好我一樽同刻  
燭荆卿且和漸離筑悠悠世事總浮雲別君何  
處窮途哭

周茂蘭

子佩蘇州人係忠介公諱順昌長子

追和采芝歌

薄言采芝于彼澗東苟免折軀委心持窮  
薄言采芝深入于嵩聊以實腹可傲三公  
燁燁紫芝草中之靈黃皇不作深谷潛形  
燁燁紫芝植物之瑞哀哀濁世如何獻媚  
山有芝亦可採也荆棘載途何可掃也不可掃  
也吾何歸也

黃孝子端木尋兩親于滇中迎歸故里  
端木稱純孝忘身歷百蠻尋親涉滇海棄子別  
吳山暮宿干戈裏朝遊烽火間故鄉非作夢驚  
喜淚潛潛



孝思神鬼格萬里不愁長渡水蛟龍隱登山虎  
豹藏未來白鹽井先到碧雞坊十載言離別明  
朝又束裝

王五癡積制錢為佛像五軀送供虎丘  
禪院

姑蘇城中王五癡心藏妙義人不知大明錢法  
將改革千貫萬貫徐收之或謂王子實謀利計  
筭必及銖與緡豈其骯髒存胸次恭成法相係  
所思法相滿月真微妙光瑩潔淨如琉璃非一  
非三列為五海湧峰頭儼在茲天女天花散若

雨鶴澗永作青蓮池

周蓼邨

貞妻苦蟲湖廣江夏人

喜寇白門較書南還

萬苦千辛出帝畿河水燕雪少人知臨風一道  
烏鬢髻直似三更魏博時

京師破較書  
馬上馳還







